

Հ Ա Շ Վ Ե Տ Վ ՈՒ Թ Յ ՈՒ Ն

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՏՐԱՆՍՊՈՐՏԻ, ԿԱՊԻ ԵՎ ՏԵՂԵԿԱՏՎԱԿԱՆ ՏԵԽՆՈԼՈԳԻԱՆԵՐԻ ՆԱԽԱՐԱՐԻ ԳՈՐԾՈՂՄԱՆ ԱՐԴՅՈՒՆՔՆԵՐԻ ՄԱՍԻՆ

◆ ԱՆՈՒՆԸ, ԱԶԳԱՆՈՒՆԸ

Աշոտ Հակոբյան,

◆ ԶԲԱՂԵՑՐԱԾ ՊԱՇՏՈՆԸ

ՀՀ տրանսպորտի, կապի և տեղեկատվական տեխնոլոգիաների նախարար,

◆ ԳՈՐԾՈՂՄԱՆ ՎԱՅՐԸ ԵՎ ԺԱՄԿԵՏՆԵՐԸ

Ռուսաստանի Դաշնություն, Վլադիկավկազ, 2018թ. օգոստոսի 6-ից 7-ը:

◆ ԳՈՐԾՈՂՄԱՆ ՆՊԱՏԱԿԸ

Այց Վերին Լարսի անցակետ՝ մեքենաների մեծաքանակ կուտակումների հետ կապված իրավիճակին տեղում ծանոթանալու, վրացի և ռուս գործընկերների հետ հանդիպելու, բանակցություններ վարելու և միջոցներ ձեռնարկելու համար:

◆ ՔՆՆԱՐԿՎԱԾ ԹԵՄԱՆԵՐ

ՀՀ վարչապետի հանձնարարությամբ՝ 2018թ. օգոստոսի 6-ից 7-ը ՀՀ տրանսպորտի, կապի և տեղեկատվական տեխնոլոգիաների նախարար Աշոտ Հակոբյանը մեկնեց Վերին Լարս՝ վրացի և ռուս գործընկերների հետ հանդիպելու, բանակցություններ վարելու և միջոցներ ձեռնարկելու նպատակով:

Վերին Լարս կատարված այցի շրջանակներում ՀՀ տրանսպորտի, կապի և տեղեկատվական տեխնոլոգիաների նախարար Աշոտ Հակոբյանը և Վրաստանում Հայաստանի արտակարգ և լիազոր դեսպան Ռուբեն Սադոյանը Վերին Լարսի անցակետում, որտեղ կարգավորվում է էլեկտրոնային հերթագրումը, հանդիպեցին և

գրուցեցին հայ վարորդների հետ, լսեցին նրանց դժգոհությունները՝ կապված անցակետի գործունեության հետ:

Կուտակումների հիմնական պատճառը, ըստ նախնական տվյալների, զբոսաշրջային հոսքերի ավելացումն էր: Անցակետերում առաջնահերթությունը տրվում էր մարդատար մեքենաներին, ինչի հետևանքով բեռնատար մեքենաների անցումը ձգձգվում էր: Ըստ վարորդների՝ վրացական կողմում այն տևում է 3-4 օր:

Անմիջապես վարորդների հետ հանդիպումից հետո նախարարը և դեսպանը Վերին Լարսի անցակետում կարճ հանդիպում ունեցան վրացի գործընկերների հետ: Վրացական կողմը հավաստիացրեց, որ մարդատար յուրաքանչյուր մեքենայի ձևակերպումները տևում են ոչ ավել, քան 2 րոպե, իսկ բեռնատար տրանսպորտային միջոցներին՝ առավելագույնը 10-15 րոպե (հաճախ ավելի պակաս):

♦ ՀԱՆԴԻՊՈՒՄՆԵՐ

Այցի շրջանակներում ՀՀ տրանսպորտի, կապի և տեղեկատվական տեխնոլոգիաների նախարար Աշոտ Հակոբյանի, Վրաստանում Հայաստանի արտակարգ և լիազոր դեսպան Ռուբեն Սադոյանի, Դոնի Ռոստովում ՀՀ գլխավոր հյուպատոս Վարդան Ասոյանի և ռուս գործընկերների միջև Վերին Լարսի անցակետի ռուսական կողմում տեղի ունեցավ խորհրդակցություն:

Ռուսական կողմից հանդիպմանը ներկա եղան բոլոր այն ծառայությունների ներկայացուցիչները, ովքեր պատասխանատու են անցակետում համապատասխան գործողությունների իրականացման համար:

Հանդիպման ընթացքում քննարկվեցին Լարսի անցակետում ստեղծված իրավիճակը և խոշոր կուտակումների հիմնական պատճառները:

Ռուս գործընկերները ներկայացրեցին որոշակի վիճակագրական տվյալներ: Նրանք նշեցին, որ, ի տարբերություն 2017 թվականի տվյալների, 50 տոկոսով աճել է մարդատար մեքենաների, զբոսաշրջիկների՝ անցակետից օգտվելը: Ըստ կանխատեսումների՝ առաջիկայում այդ աճը կշարունակվի:

Լարսի անցակետը, համաձայն կանոնակարգի, ունի նախագծային անձնագիր, ըստ որի՝ այն օրական պետք է սպասարկի առավելագույնը 170 բեռնատար ավտոմեքենա,


3000 ֆիզիկական անձի, սակայն օգոստոսի 5-ի դրությամբ փաստացի սպասարկվել է 500 բեռնատար մեքենա և 15 հազար քաղաքացի:

Ռուս գործընկերների փոխանցմամբ՝ քանի որ անցակետում առաջնահերթությունը տրվում է մարդատար ավտոմեքենաներին, հետևաբար, ուղղակի փոխկապակցված ձևով, բեռնատար մեքենաների թողունակությունը նվազել է: Մարդատար տրանսպորտային միջոցների կուտակումներ լինելու դեպքում Լարսի անցակետի սպասարկող բոլոր ուղիները տեղափոխվում են սպասարկելու մարդատար մեքենաներին:

Ռուս գործընկերները տեղեկացրին, որ շուրջ 2 շաբաթ առաջ անցակետում տեղի է ունեցել Մոսկվայից ժամանած մի խումբ պաշտոնյաների խորհրդակցություն: Ռուսական կողմը, ևս մտահոգ լինելով առաջացած կուտակումներով և քաղաքացիներին պատճառվող անհանգստությամբ, որոշում է կայացրել, որպեսզի շահագրգիռ բոլոր գերատեսչությունները շատ կարճ ժամկետներում ներկայացնեն առաջարկություններ, որոնցով հնարավոր կլինի բարձրացնել թողունակությունը՝ հաշվի առնելով նաև անցակետի աշխարհագրական բարդ դիրքը: Նրանց համոզմամբ՝ պետք է արդիականացվեն որոշ կանոնակարգեր և տրվեն ինժեներական լուծումներ:

Իրենց հերթին Հայաստանի իշխանությունները, օգտագործելով երկու երկրների միջև գործող հարաբերությունները, կփորձեն պարզել, թե ուսա գործընկերները ինչ հեռանկարանային լուծումներն են նախատեսում իրականացնել՝ այսուհետ նման իրավիճակները նվազեցնելու նպատակով:

◆ **ՍՏՈՐԱԳՐՈՒԹՅՈՒՆ**



Աշոտ ՀԱԿՈԲՅԱՆ

06.09.2018թ.